

Il gremi editorial è elegì

Chasa Editura Rumantscha

■ **(Ir) La suprastanza da la Lia Rumantscha ha elegì da nov il gremi editorial da la Chasa Editura Rumantscha (CER). En chaussas da persunal è la chasa editura uschia cumpletta. La fin d'avrigl mida la Chasa Editura Rumantscha sedia, da nov è quella en Chasa Rumantscha.** Las elecziuns substitutivas èn

stadas necessarias, damai ch'ìls anteriurs commembers dal gremi editorial (*Roman Caviezel, Renata Coray, Esther Krättli, Clà Riatsch, Anita Simeon*) avevan demissiu. Sin giavisch da la Lia Rumantscha ha l'Uniun per la Litteratura Rumantscha proponì persunas adattadas per il gremi editorial che decida tge titels che la CER edescha. Il chantun Grischun, l'Uffizi federal da cultura e Pro Helvetia han beneventà la nominaziun succedida. La suprastanza da la Lia Rumantscha ha silsuent elegì las suandantas persunas en il gremi editorial da la Chasa Editura Rumantscha: *Renzo Caduff*, assistent per scienza da litteratura e linguistica rumantscha a l'Universitad da Turitg, Villars-sur-Glâne; *Roman Caviezel*, magister da franzos a la Scola chantunala grischuna, Cuir; *Annetta*

Ganzoni, collavuratura scientifica en l'Archiv svizzer da litteratura, Berna; *Rita Uffer*, redactura tar Radiotelevision Svizra Rumantscha, Savognin; *Bettina Vital*, translatura e coordinatura per il rumantsch a la chanzlia federala, Turitg.

Da nov en Chasa Rumantscha

La fin d'avrigl 2013 mida la Chasa Editura Rumantscha sedia. Actualmain è quella en la Reichsgasse, da nov en Chasa Rumantscha a la Via da la Plessur 47 a Cuir. La CER che vegn manada editorialmain sco societad autonoma po profitar a la nova sedia da sinergias cun la Lia Rumantscha, la locataria principala da la Chasa Rumantscha.

Program d'ediziun multifar

La Chasa Editura Rumantscha elavura era quest onn in program d'ediziun multifar. La proxima ovra che cumpara è da *Corin Curschellas* e sa numna «La Grischun». I sa tracta d'in cudesch da chanzuns biling, en ils idioms, rumantsch grischun e tudestg, cun descripziuns davart las chanzuns e cun in disc cumpact dubel. L'ovra cumpara il zercladur.